

Malaquias ayvu oĩa

Malaquias ayvu oĩa

Israel kuery Jerusalém tetā py ikuai va'e templo omoatyrō ju teĩ Nhanderuete ojapo uka va'ekue rupi e'ŷ teri ikuai. Ha'e kuery pe profeta Malaquias ijayvu ojeko rerova aguã, mba'eta Senhor ára ou oiny ramo. “Senhor ixondaro reta va'e aipoe'i: ‘Ou ma oiny ára tatakua rami haku raxa va'erã. Onhembovate rei ha'e teko vai rupi ikuai va'ekue okaipa 'rã mba'emo pirukue rami rive, mba'eta ára ou ramo okaipa 'rãe. Ha'e rami vy ndopytai 'rã hapokue neĩ hi'ygue. Ha'e rã peẽ kuery xerery pendu vy xerenonde pejererokyjea rupi pendekuai va'e pe ma kuaray rami 'rã ojekuaa teko porã. Hexakãa rupi 'rã ou nhomoingo porãarã. Ha'e ramo pepo-pepo reve 'rã peẽmba, vaka ra'y kuery kora gui oẽ va'e rami avi. ... Ha'e gui Senhor ára tuvixa ha'e ijavaete va'e ovaẽ ta ramo pendea py ambou ju 'rã profeta Elias. Ha'e va'e ma oguerova 'rã tuu kuery py'a re oĩ va'e, gua'y kuery oayvu ju aguã rami, ha'e ta'y kuery py'a oguerova avi 'rã nguu kuery oayvu ju aguã. Ha'e rami e'ŷ ramo aju jevy vy yvy amomba 'rã ayvu vai py' ”, he'i (4.1-2, 5-6).

Ha'e rami py Antigo Testamento ijapy. Ha'e va'e rire 400 ma'etŷ rivyvyia py ma Jesus Cristo ou.

Jacó oayvua rami SENHOR ijayvuague

¹ Kova'e ayvu ma Malaquias pe SENHOR omombe'u uka va'ekue Israel kuery rovai.

² — Xee ma roayvu va'e — he'i SENHOR.
 Ha'e rã peẽ kuery ma peporandu:
 — Mba'exá vy tu ndee orerayvu?
 SENHOR ombovai:
 — Esaú ma Jacó ryke'y e'ŷ teve raka'e? Ha'e rami
 teĩ Jacó ae ayvu,
³ ha'e rã Esaú re ma ndaxe'a'ei, ha'e rami vy
 ha'e kuery rekoarã yvyty ome'ẽ mbyre ambovaipa
 vy amboaxa raka'e jagua-tuvy nhe'ẽ tekoá e'ŷa
 rupigua pe rive — he'i.*

⁴ Ha'e gui ma xapy'a rei Edom pygua kuery*
 aipoe'i 'rã: “Kore nhanderekoa SENHOR ombo-
 vaipa teĩ oityague py ae ju 'rã jajapopa”, he'i 'rã
 okuapy.

Ha'e rã SENHOR ixondaro reta va'e ma aipoe'i:
 “Ha'e kuery ojapopa teĩ xee aitypa ju 'rã. Ha'e rami
 rire Edom yvy omboerya 'rã: ‘Yvy teko vai renda’,
 ha'e ‘Ha'e kuery pe SENHOR ipoxy raka'e rã peve’
 'ea 'rã.

⁵ Ha'e nunga penderexa py ae 'rã pexa. Ha'e vy
 ‘SENHOR tu ipo'akapa va'e rima ra'e, Israel kuery
 ikuai rupi anho e'ŷ, peje 'rã”, he'i.

Sacerdote kuery pe SENHOR ijayvu eteague

⁶ SENHOR ixondaro reta va'e aipoe'i:
 — Ta'y kuery ikuai va'e omboete 'rã nguu, ha'e
 tembiguai kuery voi omboete 'rã herekoá. Ha'e
 rami teĩ xee ri Penderu aiko teĩ mamo tu oĩ xem-
 boetea? Xee ri Pendererekoa ae avi aiko teĩ mamo

* **1:3** Romanos 9.13 * **1:4** Edom ma Esaú rery mboae (Gênesis 25.30). Ha'e rami vy Edom pygua kuery ma Esaú ramymino ikuai. Ha'e rã Israel kuery ma Jacó ramymino ikuai.

tu ha'vy oĩ xemboetea? Mba'eta peẽ sacerdote kuery pendekuai va'eri xerery napemboetei va'e.

— Ha'e rã peẽ kuery ma peporandu 'rã: “Mba'e nunga py tu noromboetei ri nderery?” peje 'rã.

⁷ — Ambovai: “Mba'eta mbojape ha'eve'ŷ va'e rive peme'ẽ xevyguá altar áry”, ha'e.

— Ha'e gui peporanduve tema: “Mba'e nunga py tu ndee noromboetei?”

— Ambovai: “Mba'eta aipopeje: ‘SENHOR pegua mesa ma ojou vaipy’ pejea py.

⁸ Mba'eta xevy pe peme'ẽ 'rã mymba oma'ẽ e'ŷ va'e. Ha'e nunga rive peru ramo nda'evei e'ŷ teve? Ha'e rami e'ŷ vy hetyma rovai va'e, e'ŷ vy imba'eaxykue peru ramo nda'evei e'ŷ avi teve? Xapy'a rei penderuvixa pe ha'e ramigua peme'ẽ va'e rire ha'e va'e nda'u pendejou porã vy pendererovy'a 'rãgue? Any”, he'i SENHOR ixondaro reta va'e.

⁹ — Aŷ ma pejapukai ke Penderuete pe penemboaxy nho aguã. Ha'e rami avi namigua pendepo py peme'ẽ va'erã peru ramo xee rojou porã 'rã teve? — he'i SENHOR ixondaro reta va'e.

¹⁰ — Ha'eveve 'rãgue peẽ kuery va'e regua xero rokẽ pembotypa va'e rire, xevyguá altar áry tata napemoendy rivevei aguã. Mba'eta xee ma ndoroguerovy'ai ruxã'i ma voi. Ha'e rami vy ndajopyi 'rã guive peme'ẽ va'erã pendepo py Peru va'e — he'i SENHOR ixondaro reta va'e.

¹¹ — Ha'e rã yvy regua ikuiaia rupi ma xerery omboete 'rã okuapy, kuaray oẽa katy guive oikea katy peve. Opa rupi xevy oapy 'rã heakuã porã va'e, ha'e iky'a e'ŷ va'e anho 'rã ogueru ome'ẽ va'erã. Mba'eta xerery omboetea 'rãe yvy regua

kuery ikuaria rupi — he'i SENHOR ixondaro reta va'e.

¹² — Ha'e rã peẽ kuery ma pemongy'apa xerery, mba'eta aipopeje: “SENHOR pegua mesa ma ha'eve'ŷ va'e, ha'e hi'áry tembi'u nhame'ẽ va'e voi ojou vaipy”, peje.

¹³ Aipopeje avi: “Ai nhanekane'õ rive ma!” peje vy xemboetea rupi e'ŷ pendekuai. Mba'eta oixu'upa pyre peme'ẽ, hetyma rovaikue, ha'e imba'eaxykue guive. Namigua rive peme'ẽ ramo xee ajopy 'rã ri ty'y pendepo gui? Any — he'i SENHOR ixondaro reta va'e.

¹⁴ — Ijayvu vaipy toiko xembotavypaxe va'e, guymba hexaĩmba va'e oguereko vy ha'e va'e ae SENHOR pe ome'ẽ aguã re ijayvu teĩ hekovia ivaikue'i rive ome'ẽ va'e. Mba'eta xee ma huvix-ave yvate ete va'e aiko. Ha'e ramo yvy regua kuery ma xerery oendu vy oikuua pavẽ 'rã ijavaete va'e aikoa — he'i SENHOR ixondaro reta va'e.

2

Sacerdote kuery ombopaga aguã re ijayvuague

¹ SENHOR ixondaro reta va'e aipoe'i:

— Aŷ peẽ sacerdote kuery, pendevy pe xeayvu mba'emo ajapo uka vy.

² Ha'e gui napendu potai, ha'e pendepy'a re xerery pemboete aguã napemoĩ ramo pende'áry ambou 'rã ayvu vai. Rogueroayvu porã 'rãgue py xeayvu vai 'rã pendevy. Xeayvu vai ae ma guive, ha'e rami aguã pendepy'a re napemoĩ rire.

³ Ne'ixa, peneramymino kuery pe voi xeayvu 'rã, ha'e penderova re amombo 'rã mymba peme'ẽ

va'erā̄ peru va'ekue repoxi, ha'e nunga reve pen-
dereraapaa avi aguā.*

⁴ Ha'e ramo peikuua 'rā Levi ramymino kuery pe
xereve guarā ajapo va'ekue oī riae aguā ajapo uka
po rami — he'i SENHOR ixondaro reta va'e.

⁵ — Mba'eta Levi ramymino kuery pe xereve
guarā ajapo va'ekue ma tekove ha'e ikuai porā
aguā regua. Ha'e va'e mokoīve ame'ē xerenonde
ojererokyjea rupi ikuai aguā. Ha'e ramo ha'e
kuery ma xerenonde ojererokyjea rupi oryryi ete
karamboae xerery oendu vy.

⁶ Ijuru py oī va'ekue anhetē ete rupi nhombo'ea,
ha'e rā̄ ha'eve e'ŷa rami joguerekō aguā ma noī
va'ekue ijuru py. Xereve peteī rami ikuai va'ekue
teko porā rupi. Ha'e rami vy heta va'e kuery
ombo'e ojejavya gui ojepe'a aguā rami.

⁷ Mba'eta sacerdote kuery ma ojuru py 'arandu
re ijayvu aguā rami ikuai, ha'e kuery juru gui
avakue oendu aguā o'arandurā, mba'eta SENHOR
ixondaro reta va'e ayvu reraa ikuai.

⁸ Ha'e rā̄ peē kuery ma ha'e va'e tape gui pejepē'a
vy penhombo'ea rupi heta ma pejapo ojejavy aguā
rami. Pejepē'a rive Levi ramymino kuery pe
xereve guarā ajapo va'ekue gui — he'i SENHOR
ixondaro reta va'e.

⁹ — Ha'e nunga rupi ae xee rojapo ojou vaipy
ha'e omboetepy e'ŷ pendekuai aguā rami heta
va'e kuery renonde, tape aeja va'ekue rupi napen-
dekuai, ha'e lei rupi e'ŷ, ha'eve'ŷa rami anho pe-
joguerekō rire — he'i.

* **2:3** Ha'e kuery iky'apa va'e ikuia rami ijayvu, mba'eta mymba
repxi ma oapya aguā py 'rā heraa (Levítico 16.27).

Nhanderayxy kuery pe jajejavy e'ŷ aguã re ijayvuague

¹⁰ Nhanderu ma peteĩ'i va'e'ŷ ri ty'y oiko? Nhan-deruete e'ŷ teve nhanemoingo pavẽ raka'e? Mba'e re tu ha'vy anhetẽ rupi e'ŷ jajoguereko? Ha'e rami vy nhambovaipa nhaneramoĩ kuery pe Nhan-deruete guexeve guarã ojapo va'ekue.

¹¹ Mba'eta Judá kuery ma ojeroviapy rupi e'ŷ ikuai vy ojeguarupy ojapo Israel yvy re, Jerusalém tetã py guive. Mba'eta SENHOR pegua oo iky'a e'ŷ va'e oguerovy'a ete va'e ma Judá kuery omongy'apa vy omenda tuuete ramigua mboae mboetea kuery re.

¹² Ha'e gui avakue ha'e rami ete ojapo va'e rei SENHOR omokanhymba 'rã Jacó kuery ikuiai gui, SENHOR ixondaro reta va'e pe mba'emo ome'ẽ va'eri.

¹³ Pova'e nunga pejapo avi va'e. Mba'emo peme'ẽ va'e re ha'e nomã'ẽvei, pendepo gui ndojopyvei ndoguerovy'avei vy. Ha'e ramo SENHOR pegua altar pejao'i 'rã pendexay py. Pejae'o reve penepoaẽ rei pekuapy.

¹⁴ Ha'e rami vy peporandu guive vy “Mba'e re tu nanhandererovy'avei?” peje. Mba'eta SENHOR oikuua porã nekunumi vy ndera'yxyrã reraa va'ekue reve peteĩ rami pejoguereko aguã pe-japoague. Pendera'yxy kuery ma peneirũ oiko, peteĩ rami pendekuai aguã pejapoague regua teĩ ha'e kuery pe pejejavy.

¹⁵ SENHOR peteĩ rami e'ŷ teve ava ha'e kunha omoingo raka'e, peteĩ'i nhe'ẽ omoĩ reve? Mba'erã tu peteĩ rami omoingo raka'e? Mba'eta oipota ta'y kuery ha'e hamymino kuery ixupe ete ikuai. Ha'e nunga rupi peikuaa pota pendejee ae. Avave

rei tojajevy eme gua'yxyrā kunumi jave ogueraa va'ekue pe.

¹⁶ Mba'eta SENHOR Israel kuery Ruete aipoe'i: “Xee ndajou porāi joegui opoi va'e, neī joguero'aa rupi onhemongy'apa rei va'e”, he'i SENHOR ixondaro reta va'e. Ha'e nunga rupi peikuua pota pendejee ae, joupe pejejavy e'ŷ aguā.

SENHOR ou jevy e'ŷ mbove ixupegua Anjo ojekuua aguā re ijayvuague

¹⁷ Peē kuery pemomboriau SENHOR pendeayvu py. Ha'e ramo aipopeje: “Mba'e nunga py tu romomboriau?” peje. Mba'eta pendejeupe ae aipopeje: “ SENHOR omboeko porā 'rā teko vai apoa kuery, oguerovy'a guive”, peje. Ha'e rami e'ŷ vy “Mba'exa tu oiko Nhanderuete nhombopaga aguā?” peje rive.

3

¹ SENHOR ixondaro reta va'e aipoe'i:

— Xerenonde rupi amondouka 'rā xeayvu reraarā tape oguereko katu aguā. Ha'e gui ma Senhor pearō pekuapy va'e ou xapy'a 'rā ojeupegua templo py. Ha'e va'e ma xeremimbou, xereve guarā ajapo va'ekue kuua ukaarā ambou va'e, peipota va'e ae. Ne'exa, ou ma oiny.*

² Ha'e rami avi mava'e tu ogueropo'aka 'rā oua ára? Ha'e ojekuua ramo mava'e tu opyta 'rā ho'amy? Mba'eta tata ouro ky'a'oa rami oiko, kavō ao joia rami guive.

³ Mba'eta openaaty py oguapy 'rā joky'a'o aguā prata omboyku reve oiky'a'oa rami. Ha'e vy

* **3:1** Mateus 11.10, Marcos 1.2, Lucas 7.27

oiky'a'o 'rã Levi ramymino kuery, ouro ha'e prata rami ete 'rã oiky'a'o. Ha'e ramo mae SENHOR pe ha'e kuery ogueru 'rã ha'evea ramigua ome'ẽ va'erã.

⁴ Ha'e ramo SENHOR oguerovy'a 'rã mba'emo Judá ha'e Jerusalém pygua kuery ome'ẽ va'e, yma guare rami, ára jypy guare rami.

⁵ — Pendere aikuua pota vy 'rã aju pendea py. Ha'e rami vy are'ŷ'i re xeayvu 'rã imba'evyky va'e kuery rovai, itavy rei va'e, oura rive-rive va'e, omba'eapo va'e pe ha'eve'ŷ'a rami opaga va'e kuery, imeve'ŷ va'e ha'e tyre'ŷ moingo axya, amboae yvy guigua rerekó axya, ha'e xerenonde ojererokyje rupi e'ŷ ikuai va'e ha'e javi rovai — he'i SENHOR ixondaro reta va'e.

Dízimo ha'e mymba nome'ẽ porãi okuapya py imonda rã ijayvuague

⁶ — Mba'eta xee SENHOR ma ojeko rerova va'e'ŷ aiko. Ha'e nunga rupi peẽ Jacó ramymino kuery, napekanhyi.

⁷ Mba'eta peneramoĩ kuery ikuai guive ma voi pejepa'e xeayvu aeja va'ekue gui, ndapejapoi ete. Pejevy ju ha'vy xea py, ha'e ramo xee voi ajevy ju 'rã peẽa katy — he'i SENHOR ixondaro reta va'e.

— Ha'e rami teĩ peẽ kuery aipopeje: “Mba'exa tu rojevy aguã rami roiko?” peje.

⁸ Ha'e rami avi peẽ avakue penemonda 'rã ri ty'y Penderuete gui? Mba'eta peẽ kuery penemonda xegui. Ha'e ramo aipopeje: “Mba'e nunga py tu oremonda ndegui?” peje ramo xee ambovai: “Dízimo ha'e mymba napeme'ẽ porãia py”, ha'e.

⁹ Xegui penemonda rire ayvu vaipy peiko, peẽ kuery ha'e javi.

10 Peru ke ha'vy dízimo ha'e javi mba'emo omoī porāaty py, xevyguia opy oī aguā tembi'u. Xera'ā ke ha'e nunga py — he'i SENHOR ixondaro reta va'e. — Ha'e rami rā yva re janela oī va'e aipe'a vy peē kuery áry anhoē 'rā penemoingo porāarā, oīmba aguā nda'evei peve.

11 Peē kuery re ama'ẽ vy xeayvu ete 'rā mba'emo aju 'upaa pe, pendeyvy gui mba'emo aju oiko rā omomba e'ŷ aguā, uva penhotŷ va'ekue voi ndai'a ve'ŷi aguā — he'i SENHOR ixondaro reta va'e.

12 — Ha'e gui pendeyvy iporā ete ramo pendevy ha'e javi regua “Ovy'a ete va'e” he'i 'rā okuapy — he'i SENHOR ixondaro reta va'e.

Heko porā va'e ha'e heko vai va'e joo ramigua e'ŷ ikuiaia re ijayvuague

13 SENHOR aipoe'i:

— Pendeayvua ma nda'evei ete xevy. Ha'e rami teĩ peē ma aipopeje: “Mba'exa tu oreayvu ndere?” peje.

14 Mba'eta aipopeje: “Nda'eve ranhei Nhanderuete pe nhandekuaia. Mba'e 'rā tu jajou ijayvua jajapo vy, ha'e SENHOR ixondaro reta va'e renonde rupi jajae'o reve nhandekuai vy?

15 Mba'eta nhande jaikuaa onhembovate rei va'e kuery ov'y'a reia. Ha'e kuery opa marā rei ikuai teĩ ma ikuai porā. SENHOR re voi opu'ā va'eri oo jepe”, peje rive.

16 Ha'e rā SENHOR renonde ojererokyjea rupi ikuai va'e ma jomeme ijayvu okuapy. Ha'e ramo SENHOR oendu pota. Ha'e rami vy SENHOR renonde peteĩ kuaxia omboparaa, henonde ojererokyje ha'e hery re ima'endu'aa rupi ikuai

va'e rery oĩa, ha'e kuery re avi ima'endu'aa riae aguã.

¹⁷ SENHOR ixondaro reta va'e aipoe'i:

— Aikuaa pota aguã ára ovaẽ ramo ha'e kuery ma xevyguia arov'y'a ete va'e ikuai 'rã. Ha'e kuery re apena 'rã petei ava gua'y ixupe ae oiko va'e re openaa rami avi.

¹⁸ Ha'e gui teigue ju peikuaa 'rã heko porã va'e ha'e heko vai va'e joo ramigua e'ý ikuai, mba'eta Nhanderuete ma ojeupegua kuery ha'e ojeupegua e'ý joo rami e'ý 'rã oguerek.

4

Kuaray rami teko porã ojekuaa aguã re ijayvuague

¹ SENHOR ixondaro reta va'e aipoe'i:

— Ou ma oiny ára tatakua rami haku raxa va'erã. Onhembovate rei ha'e teko vai rupi ikuai va'ekue ma okaipa 'rã mba'emo pirukue rami rive, mba'eta ára ou ramo okaipa 'rãe. Ha'e rami vy ndopytai 'rã hapokue neñ hi'ygue.

² Ha'e rã peẽ kuery xerery pendu vy xerenonde pejererokyjea rupi pendekuai va'e pe ma kuaray rami 'rã ojekuaa teko porã. Hexakãa rupi 'rã ou nhomoingo porãarã. Ha'e ramo pepo-pepo reve 'rã peẽmba, vaka ra'y kuery kora gui oẽ va'e rami avi.

³ Ha'e rami vy pepyrõmba 'rã heko vai va'e re, pendepy guýry tanhimbu rami 'rã ha'e kuery opyta, aikuaa pota aguã ára ovaẽ ramo — he'i SENHOR ixondaro reta va'e.

⁴ — Penema'endu'a ke lei xerembiguai Moisés ombopara va'ekue re. Mba'eta Israel kuery ha'e

javi pe aeja va'ekue Horebe yvyty áry, xeayvua ha'e aipota va'e reve.

⁵ — Ha'e gui xee SENHOR ára tuvixa ha'e ijavaete va'e ovaẽ ta ramo pendea py ambou ju 'rã profeta Elias.*

⁶ Ha'e va'e ma oguerova 'rã tuu kuery py'a re oĩ va'e, gua'y kuery oayvu ju aguã rami, ha'e ta'y kuery py'a oguerova avi 'rã nguu kuery oayvu ju aguã. Ha'e rami e'ŷ ramo aju jevy vy yvy amomba 'rã ayvu vai py.

* **4:5** João Batista ou jave heta va'e kuery onhe'ẽ rendu va'e rire ma ha'e ae oiko 'rãgue Elias ou ju 'rã va'ekue. Ha'e rami teĩ heta va'e kuery nonhe'ẽ rendui ramo Elias ou teri aguã rami oiko (Mateus 11.13-14, 17.10-13; Lucas 1.17).

Nhanderuete ayvu iky'a e'ŷ va'e New Testament in Guaraní, Mbyá

copyright © 2004 Wycliffe Bible Translators, Inc.

Language: Mbyá Guaraní (Guaraní, Mbyá)

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 853110565X

The New Testament

in Guaraní, Mbyá

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 11 Nov 2022 from source files
dated 29 Jan 2022
3309fa3b-7590-5ae9-b829-5df4ddfbf957